

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Un siman bendishoná pa nos fiel bishitantenan di plenchi. Nos ta den rekta final ku e programa di skol. Plenchinan tabata yen di suspenso pa resultado di EFO pero tambe di eksamen di VSBO, Havo/VWO i SBO. Mayornan den suspenso, muchanan no papia mes. Tabatin harimentu i yoramentu. Emoshonan den tur eskala. Pabien na tur ku a logra nan meta. Un fundeshi pa sigui konstrui bo formashon personal. Selebrá e logro aki i mesora traha plan pa sigui desaroya bo mes. Esnan ku no a logra nan meta, no pèrde speransa. Ahustá di nobo i purba plania i ehekutá pa mehorá bo mes. No hasie pa niun hende, hasie pa bo mes. Dosentenan tambe ta semper masha ansioso pa mira e resultado. Nan ta hari i yora pareu ku nan studiantenan. Nan ta mira e resultado komo parti di nan dedikashon i motivashon. Dosentenan, danki pa kere den boso studiantenan. Pa siña nan ku nan mester kere den nan mes i ku trabou duru por logra metanan bunita den bida. Pabien na studiantenan, mayornan i e tim di skol ku e logronan.

Planifikashon pa otro aña ta kuminsá bira mas urgente. Awor por plania mas sigur, paso tur hende tin bista basta eksakto kuantu mucha a slag i kuantu ta kuminsá na e skol pa promé biaha. Falta ainda e resultado final di ken ta keda sinta òf bai e siguiente aña. E grupo ei tin un tiki tempu mas pa keda den suspenso. Tuma e wikent aki pa bo relahá i gradisí pa loke bo a logra, òf pa e posibilidatnan ku bo tin pa logra.

Ta dia di tata mañan, kòrda duna tata hopi kariño. E dia di tata aki nos ke duna homenahe postumo na sr. Donny Bakhuis. Un tata ku semper a traha ku alma i kurpa pa nos identidat katólíko. Sr. Donny Bakhuis, sosegá na pas paso bo mishon ta kumpli. Forsa na famia di sr. Bakhuis.

Riba roster



Esaki ta Radulphus College, despues di eksamen. E hóbennan a sorpresá tur hende na skol dor di krea un senario di delito. A resultá ku nada no a pasa, ta djis paso nan a kaba ku nan eksamen.

Not'é riba bòrchi

Un pabien na tur e alumnonan di Kolegio Sta. Famia. 100% a slag. E alumnonan di grupo 8 a terminá ku nan prueba final pero no ku nan formashon total. Awe a sigui traha duru riba nan proyekto pa traha mueble for di palèt. Nos tin talento pa parti. Nos ta orguyoso di tur e alumnonan



Den agènda

2 yuli (djadomingu) dia di bandera

7 yuli último dia di skol.

14 i 15 di ougustus 2017 startconferentie pa tur trahado di RKCS

17 di ougustus 2017 promé dia di skol pa hóbennan

Riba rapòrt

Aki un raportahe di st. Margaretha College ku nan 100% geslaagd.



Mi ta konta

Danki na e sr. Donny Bakhuis pa su dedikashon añanan largu den direktiva di skolnan katóliko. Nos ta uni nos mes na e dedikatorio di st. Thomas ku nos ta inklui aki bou.



St. Thomas Kring i RKCS ta bisa Donny Bakhuis: Te despues

Skibi pa Anthony Haile

Ku tristesa St. Thomaskring i direktiva di RKCS a tuma nota di fayerimentu di Sr. Donny Bakhuis. Pa mas di 20 aña Sr. Bakhuis tabata Presidente di St. Thomaskring i kada aña ku un hopi entusiasmo komo Presidente e tabata organisá e retrèt eksklusivamente pa hende hòMBER na Skèrpènè. 10 aña pasa Donny a haña ku a yega e ora pa pasa e batuta di Presidente pa un otro persona mas hóben. Sr. Donny Bakhuis tabata forma parti tambe di e direktiva anterior di Skolnan Katóliko pa varios aña, te dia a lanta e Fundashon aktual di RKCS na 1970. Un frase masha konosí di sr. Bakhuis tabata:”Enseñansa ta di Gobièrnu, pero enseñansa Katóliko ta di ‘nos’ ”.

Donny tabata un persona hopi skèrpi i semper tabata trese su pensamentunan dilanti di un manera ku no tabata laga duda. Nos ku tabata asistí na e retrèt di tur aña tabata testigu di esaki. No purba di duna Donny un kontesta lalilali pasombra bo ta den problema. Aparte di partisipashon na e retrèt Donny tabata un di e integrantenan di e Kor di St. Thomas. Semper e tabata tin su instrumento musikal serka dje . Durante di e último 2 añanan aki a bira difísil pa Donny asistí na nos retrèt dor di su estado di salu pero Semper e tabata keda pendiente di resultado di nos retrèt.

Na yüni 1997 Mgr. Wim Ellis a instituí un komishon pa bini ku un guia general pa tur parokia di Obispado di Willemstad. Donny Bakhuis huntu ku

diferente otro persona a traha masha duru riba e enkargo aki, pa hasi e reportahe di nos pastornan enkargá ku un parokia mas transparente. Donny tabata esun ku tabata presidí e komishon aki i e bataya pa logra ku tur parokia ta reportá korektamente segun e guia general, tabata hopi grandi i den esaki Donny Semper tabata tuma un posehon hopi skèrpi.

Pa su kontribushon balioso na Iglesia Katólíka, Donny a risibí e kondekorashon Papal di San Silvestre. Tur aña dia 31 di desèmber tur e personanan ku a risibi e kondekorashon aki ta bini huntu den un Santu Sakrifisio di misa, sigui pa un bríndis. Ku eksepsion di fin di aña pasa, Semper Donny tabata presente.

Aparte di Iglesia katólíko, Donny tabata hopi aktivo den ACU, miembro balioso den Curaçao Lions Club, SOAB, JCI, Piacere i Flor di Kibrahacha. Pa no laga di mensioná e masha hopi komishonnan di kual ku e tabata forma parti, riba petishon di Gobièrnu di Antia Hulandes i Gobièrnu di Kòrsou. Un hòmer multifasetiko ku sigur a duna na su forma su kontribushon na bienestar di nos komunidat. Donny sigur ta un persona ku a duna su granito di un manera eksepsional. Den un palabra un Yu'i di Kòrsou ehemplar di kual nos tur por ta orguyoso di dje.

Donny nos ta hopi agradesido pa tur lokual bo a hasi pa Kòrsou. St.Thomas Kring i RKCS sigur lo rekordá bo ku hopi kariño i ta bisa bo te despues.

Na yunan, nietunan i demas famia di Donny nos mas sinsero palabra di kondolensia. Nos ta sigur ku kaminda Donny ta e ta den bon man. Donny Sosegá na Pas.

Un danki na Sr. Ramon Galmeijer pa potrèt i dokumentashon

Anthony Haile

Un prechi

Un pabien na Kolegio Nechi Pieters ku nan resultado bunita di EFO



Mucha djispou

Y COMO TE FUE EN EL EXAMEN?

